

## Fundur í skólaráði 12. febrúar 2021

### Fundargerð

Mættir: Ólafur fulltrúi foreldra, Ottó fulltrúi kennara, Guðrún fulltrúi kennara, Kristófer Nökkvi fulltrúi nærsamfélags (frístund), lðunn fulltrúi nemenda, Jörundur fulltrúi nemenda, Henný fulltrúi starfsmanna, Kristín skólastjóri og Sigríður aðstoðarskólastjóri sem einnig ritaði fundargerð.

Fundað var gegnum fjarfundabúnað.

Í upphafi fundar sagði skólastjóri sagði frá því að þátttaka foreldra í foreldrakönnun Skólapúlsins væri undir 40% og til þess að könnunin verði marktæk þarf þátttaka að verða 80%. Í framhaldi bað skólastjóri fulltrúa foreldra að skoða leiðir til að brýna foreldra, óháð því hverjir hefðu fengið boð um þátttöku. Fulltrúi foreldra ætlar að verða við því.

Undirbúningur fyrir næsta skólaár er kominn vel af stað. Starfsmannasamtöl hafa gengið vel og allt útlit fyrir að skólinn verði vel mannaður næsta skólaár.

Í gær, 11. febrúar kom erindi frá sviðstjóra Skóla- og frístundasviðs samkvæmt tillögu Skóla- og frístundasviðs þar sem farið er á leit við að Austurbæjarskóli hýsi annað tveggja íslenskuvera sem setja á upp í Reykjavíkurborg í haust. Um er að ræða sjálfstætt starfandi deild út frá MML sem hefði starfsaðstöðu í risi þar sem nú er staðsett skólamunastofa Hollvínafélags Austurbæjarskóla. Vissulega skipti skólamunastofan máli og yrði því ef af yrði að finna henni annan stað. Mikilvægt er að horfa til þess að hér hefur lengi verið litið til þess að Austurbæjarskóli sé vaggja fjölmenningar og verði svo áfram. Fulltrúi foreldra var sammála þessu, þetta væru gleðifréttir og sagði að þrátt fyrir að þykja vænt um skólamunastofuna þá væri þetta mjög jákvæðar fréttir og viðurkenning fyrir skólann. Þetta væri ekki spurning! Húsnæði skólans væri fyrst og fremst ætlað fyrir nám, kennslu og frístundastarf barna. Skólastjóri sagði í framhaldinu að skólastarf í Austurbæjarskóla myndi njóta góðs af þar sem aukin þekking bættist í húsið. Í íslenskuveri væri fyrirhugað að störfuðu tveir kennarar í fullu starfi og frístundaráðgjafi í 50% stöðu. Horft væri til þess að um 40 nemendur væru í verinu yfir skólaárið, allt frá 3 – 9 mánuði. Fulltrúi kennara benti á að líta mætti á flutning skólamunastofu sem jákvæðar fréttir en safnið fengi inni þar sem aðgengi yrði auðveldara, sérstaklega fyrir eldra fólk, eldri nemendur sem gjarnan vildu skoða safnið en treystu sér ekki upp á 4. hæð. Fulltrúi foreldra tók undir þetta.

Skólastjóri lagði fram drög að skóladagatali næsta árs og fór yfir helstu dagsetningar. Skólasetning, skólaslit og vetrarfrí eru ákveðin af yfirvöldum, en starfsdagar eru ákveðnir af skólastjórnendum og kennurum og fer síðan til samþykktar í skólaráði. Skólaráð samþykkti skóladagatal með fyrirvara um breytingar sem kunna að vera gerðar í kjölfar samráðs í hverfi.

Rætt var um nemendastýrð foreldraviðtöl, framkvæmd og áherslur. Fulltrúar nemenda lýstu yfir ánægju sinni með þetta form viðtala. Fannst gaman og mikilvægt að fá að segja frá og eiga þetta samtal við kennara og foreldra. Fulltrúi foreldra sagði að sín börn væru ánægð, hann var sáttur með að nemendur fengu platform til að ræða nám og líðan. Fulltrúar kennara voru ánægðir og sögðu breytingarnar jákvæðar, hins vegar benti annar á að praktísk atriði/hlutir þyrftu samt einhvern vettvang og spurning hvort það fengi að halda sér að hluta, hitt væri í mótun og slípun. Fulltrúi foreldra var sammála og taldi að þetta væri í æfingaferli.

Skólastjóri kynnti niðurstöður samræmdra prófa í 4. og 7. bekk. Niðurstöður voru undir landsmeðaltali og gáfu til kynna að ýmis eru sóknarfærin. Nemendahópurinn er mjög blandaður og

var lagt upp með að sem flestir þreyttu prófin. Ljóst er að rýna þarf vel í niðurstöður og greina til aðgerða. Fulltrúi nemenda sagði að í skólanum væri öflug og mikil sérkennsla en ljóst að þegar nemendur kæmu inn í bekk þá væru nemendur stundum verklausir og skiljanlega gætu kennarar ekki alltaf fylgt því eftir enda með marga nemendur. Tekið var undir að stundum væri þetta staðan og eitt af því sem stöðugt þyrfti að huga að – saman, sérkennarar og bekkjarkennarar.

Skólastjóri fór yfir niðurstöður í skólapúlsi frá því í febrúar. Mikil aukning á grænum lit sem þýðir að við erum á uppleið og margar breytingar marktækar\*. Vissulega má aldrei slaka á og horfa þarf til nokkurra þátta mjög markvisst, m.a. aga í kennslustundum. Fulltrúi kennara benti á að skrítið væri að sjá að nemendur merktu við að kennarar stoppi ekki stríðni en samt væri einelti og stríðni lítil. Fulltrúi foreldra sagðist telja að það gæti tengst upplifun nemenda af agaleysi í tímum.

Önnur mál. Fulltrúi kennara spurði hvað væri að fréttu af skólalóð, aðgengi og aðbúnaði. Skólastjóri sagði engar nýjar fréttir. Margsinnis hefði skólastjóri sent erindi þess efnis, fyrir hönd skólans og Draumalands en ekkert breyttist. Endurnýjun á skólalóð Austurbæjarskóla sé á dagskrá 2023.

Ekki var fleira tekið fyrir. Fundi slitið.

Sigríður Valdimarsdóttir